

ds titanic-syndrom

Text: Hans Jürg Zingg / Melodie: Hans Jürg Zingg
Begleitimprovisation: Edwin Peter

dä apparat isch guet
dä apparat isch guet
dä apparat dä funktioniert
dä apparat isch guet

jä – u wen er de einisch sött –

guete ma, dä apparat isch guet
guete ma, dä apparat isch guet
guete ma, dä apparat, dä funktioniert, dä isch probat
guete ma, dä apparat isch guet

aber loset emau, es chönnt doch glych einisch öppis –

guete ma, es isch no nie
es isch no nie sit dass mir hie
guete ma, dä apparat isch guet

jää – aber was macht me de, we's ne mau verjagt?

guete ma, dä apparat isch tüür
guete ma, dä apparat isch tüür
dä isch ganz unwahrschynlech tüür
drum gö mir o für ihn dür ds füür
guete ma, dä apparat isch tüür

aha – aber de säget mer wenigstens
a was me merkt, we mau öppis –

guete ma, s isch garantiert
s isch garantiert dass nüt passiert
damit dir völlig sicher syt
gä mir nech hie es mässgrät mit
guete ma dä apparat isch guet

aha, es mässgrät
u vo da bis da, im grünen, isch dr normberych
u wen er de mau i ds rot -

guete ma, das grät isch kontrolliert
guete ma, das grät isch kontrolliert

sisch usprobiert u garantiert
dass mit däm mässgrät nüt passiert
guete ma das grät isch kontrolliert

ja, henu auso, de mässe mer mau

zeiger uf grünen, aus i dr ornig
dä apparat isch würklech tiptop

gueti lüt, dä apparat isch guet
gueti lüt, dä apparat isch guet
gueti lüt, dä apparat, dä funktioniert, dä isch probat
gueti lüt, dä apparat isch guet

itz missen i de scho sit zwöiehaub jahr – u geng aus i.o.
nid ds chlynschte pänneli.
dä apparat isch würklech ds zähni!

gueti lüt, dä apparat isch guet
gueti lüt, dä apparat isch guet
gueti lüt, dä apparat, dä funktioniert, dä isch probat
o wenn weis niemmerwas passiert
dä apparat dä funktioniert
gueti lüt, dä apparat isch guet
gueti lüt, dä apparat –

rot! rot! zeiger uf rot!
was mues i ... was chan i ... was ... i ...

gueti lüt, das grät isch kontrolliert
gueti lüt, dä zeiger isch uf rot!

we das wahr isch
wüsst er, was de passiert?
i weis es äbe o nid ganz genau
das **darf eifach** nid wahr sy
wüu da – gieng ja aus zgrund
üses prestige
üsy gägner
üsy finance
katastrophe, sägen ech – aber
gopfridschtutz

aber itz halt, halt, halt, halt!
nur ruhig blut!
töif usschnuufe, scharf nachedänke:

dä apparat – isch guet
dä apparat – dä funktioniert
solang mir hie isch dä **no nie**
am apparat cha's auso nid lige
gottseidank!

das mässgrät da – isch kontrolliert
s isch usprobiert u garantiert
dass mit däm mässgrät nüt passiert
am mässgrät cha's auso o nid lige
gottseidank!

jää – aber – i däm fau – **bin i's** wo spinnt
schturme gring – farbebling – itz han i's: rot-grünen verwächslet
nume komisch, dass i's nid früecher gmerkt ha
aber es **mues** so sy

we das uschunnt!

dä apparat isch tüür
mir gö für ihn dür ds füür

nid vrsäge – niemmerem säge
nid vrsäge – niemmerem säge
nid vrsäge – niemmerem säge
nid vrsäge – niemmerem s-

(... explosion & marche funèbre ...)

(entstanden im Mai 1979)